

編號 1 號

【生趣个童年】黃美貞原作

還細時節，細人仔無科技產品好搞。毋過，屋簷下、拉杌樹、伯公下、大圳溝、竹林，聚概都係佢等个遊樂場。

佢等四姊妹，過加隔壁鄰舍个細孺仔，輒常邀等搞家啦飯仔、搞圓牌仔、揸目屏窟等等，係堵著毋使讀書个下晝頭，定著搞到斷烏，等到大人儕拿等竹修仔來尋細人仔，大家看著毋著相<sup>1</sup>正溜瀉<sup>2</sup>。

好天好時，佢等七好在圳溝項覓蜆仔。有一擺，好展个老弟嗑嗑滾<sup>3</sup>，打賭佢捉得著細蝦公，上屋个阿賢好絕絕仔應：「該愛仰仔賭？」老弟誚難<sup>4</sup>佢：「你係捉著比佢多，今暗晡佢請你食夜。」阿賢堪毋得人激，應講：「好！無問題！」該下晝，佢等先擱水窟，想同蝦公錫到水窟裡肚，毋過，細蝦公哪有恁好捉，兩下半仔蝦公就躍走也，佢等測著無意思，早就走淨淨也。無想著佢等兩儕毋肯煞，目珠眨都無眨，搵啊歸身溼漉漉、扃扃糟糟

合一身泥，水窟裡肚淨兩三尾細魚仔定定，等到暗摸胥疏，無結無煞正共快歸屋，管佢麼人輸贏？係還毋歸屋，毋單淨無飯好食，還會賺一陣皮肉痛。

又有一日，翁燒个下晝頭，佢等兄弟姊妹在屋下四週圍搞揸目屏窟。老弟係搞頭王，哪仔都尋得著來屏，搞幾下輪也搞毋煞棚。無想著坐在屋簷下个阿婆大聲喊：「共快歸來！莫在該頭牛眼樹下搞，該跡仔盡多虐毛蟲哦！」頭擺个細人仔輒常打赤腳搞到毋知頭天，樂線樂線个佢等，無同阿婆个話聽入耳，結果做鬼捉人个老妹突然間看著該生啊烏疏疏、有十過公分長个虐毛蟲，對等佢趨等來，嚇啊捋瀉<sup>5</sup>走都走毋掣！嘎「哇——」聲仔嗽出來，嶄然好搞个老弟，興撮撮仔行兼想逐該尾虐毛蟲，阿婆譴譴仔<sup>6</sup>咄：「你係畀趨啊圓身項，就會像貓拖糞粑——難敲爪<sup>7</sup>哦！」

「良言莫嫌少，朋友莫嫌多。」還細時節跔等同學陣仔、隔壁鄰舍个細孺仔弛崗打陣，一哪仔都係佢等共下行過个腳跡、看過个景色、搞過个生趣事，係佢等細人仔盡懷念个童年，該兜生趣个回憶同畫面，永久都會留在佢腦格肚。

<sup>1</sup> 毋著相：音 m<sup>ˇ</sup> cog xiong；苗頭不對。

<sup>2</sup> 溜瀉：音 bid xia；快速逃離。

<sup>3</sup> 嗑嗑滾：音 gab gab gun<sup>ˋ</sup>；喋喋不修。

<sup>4</sup> 誚難：音 seu<sup>ˊ</sup> nad<sup>ˋ</sup>；嘲笑譏刺。

<sup>5</sup> 捋瀉：音 lod xia；形容跑得很快。

<sup>6</sup> 譴譴仔：音 kien<sup>ˋ</sup> kien<sup>ˋ</sup> e<sup>ˊ</sup>；氣呼呼的。

<sup>7</sup> 敲爪：音 lod<sup>ˋ</sup> zau<sup>ˋ</sup>；本指爪子脫落，後亦借指人脫離困境或陷阱。此指像貓爪抓到麻糬一樣，難以脫身。

編號 2 號

【敬祖公】李雪菱原作

這擺五月節，阿爸帶佢等歸伙房肚去敬祖公，有蓋多牲儀擺在神桌頂，算算啊有五六十戶。叔公講：「係講過年又會過多，歇外背个會歸來，有七八十戶恁多。」輪著點香个阿亮叔比手畫腳，指撥大家个牲體擺好勢。除咗三牲以外，佢等中片伙房个子孫還會另外準備五碗炒好个齋菜，阿婆同佢等講係因為公太食齋，阿公講：「這個五燥五溼。」佢看有柿花、牛眼乾、麻糍米糍、冬瓜糖、番豆糖，還有炒好个香菇、木耳、金針、筍乾、冬粉這兜，心肝肚恁：「到底係公太愛食？還係佢等好食？」

唱核喏，愛等斟酒，大家个開始打嘴鼓，該片伯公講起頭擺歇在伙房，伙房分上片、中片、下片，敬祖个時節有蓋多人。時代變咗，伙房歇毋落，後生仔搬出去落戶，這下淨伸三四十戶咗，看起來有息把仔落寞<sup>1</sup>，故所過年過節大家个愛歸來聚集。

這片細阿叔講：「頭擺仔下片阿木叔豬欄脣野生一頭拉拔仔，阿葉哥會帶佢等歸陣細啞仔去摘來食，係分阿木姆看著，會拿祛把來操，佢等都走到死無命，毋知愛哪屏正好，到這下還會

驚到發青暝<sup>2</sup>。」大家聽著哈哈大笑。你一嘴佢一句，嗆聲滿廳下，實在有鬧熱。

這兜叔婆伯姆企在神桌脣，指等毋知哪家个雞仔，緊說畜啊蓋靚，又縐來蓋鬧。細姆姆分大家个看到面紅紅，又盡歡喜講係佢个。叔婆幹頭同阿姊講：「你等毋曾嫁个細妹仔來看一下，左魚右肉中央雞，愛記得！毋好擺差咗，正毋會分人講無教著。」

另外一片細後生仔企共下，手頂拿等手機仔，抹來抹去，有時交頭接耳講一下，有時問愛仰仔下載影片；還有人戴等耳機仔搖來搖去，一看就知在該聽熱門音樂。外背禾埕頂一大陣細猴仔跔等阿弟牯走上走下，操來操去，毋知搞麼个遊戲？看毋識哦！

阿亮叔喊：「斟酒、斟酒，銀紙愛先散便。」仰恁遠呢？嘴鼓都還毋曾講煞，全概人踇擎<sup>3</sup>去各家斟酒，一下仔無閒泊杈，左手交右手。三道酒過後、燒銀紙、磅紙炮仔。

鬧鬧熱熱个伙房，一籬鉢个生趣事，永遠都講毋核，跔等酒香飛出來、紙炮仔聲傳出來，這係幸福个香，這係幸福个聲！

<sup>1</sup> 落寞：音 log mog；落魄、蕭條。

<sup>2</sup> 發青暝：音 bod` qiang` miang`；做惡夢。

<sup>3</sup> 踇擎：音 giu` qiu`；全部聚集在一起。